

## ■ GLOSSA

# La tema dal magister tar l'attestat

DA SILVIO CAMENISCH

**F**orsa conuschais la raquinta-ziun «Die Angst des Tormanns beim Elfmeter» da Peter Handke. «Der Tormann sah zu, wie der Ball über die Linie rollte...» Blers magisters vegnan en temas e pitgiras sumegliantas, cur ch'els èn vidlonder da scriver attestats. E qua discor jau or da lunga experienza, quellas portas hai jau vairamain vesì dador e dadens. Pertge han quels magisters uschè ditg cazzola? Fin la notg en stanzas da scola e biros a chasa? Adina il temp avant ils attestats è lur consum tant d'energia electrica sco mentala fitg aut, tar tschertas collegas autezza. Tenor infurmaziun da las ovras electricas survpassa quel consum energetic lunsch tschel durant l'advent. E lura ardan bleras bleras cazzolas. Dastg'ins dir quai senza avoir beffegià?

**L**as temas da magisters tar attestats n'èn mai vegnidas retschertgadas dad experts e scienziads, ma fiss urgentamain da far. Per la sanadad dals pertutgads. U nun èn magisters la valuta da guardar co ch'els vegnan sur las rundas vi e sut las grundas or? Bleras collegas teman umens nairs, suenter ch'ellas han dà or da maun attestats debels. Insacurston ellas far quel pass, è il termin da la surdada qua. Babs biologics strusch ina giada vesids e mammas bain, tut segund massa giadas, lessan guardar l'attestat da lur unic figl. Kevin sulet a

chasa. Betg a New York. Qua, en la regiun turistica.

**B**abs e mammas moderns han bleras differenzas d'opiniuns, e quai dastgan els avoir. Nus na cumandain betg a quels tge paratgar e crair en noss stadi da dretg, gliez ans laschain a meglers. Però cur che Kevin mussa ses attestat, als s'uneschon puspè ina giada: Qua ha tia magistra fatg insatgè fallà, Kevin. Ti na s'empos nagut. Quai na laschain nus betg star uschia. Nus giain a mangiar ina pizza, e suenter a prender in psicolog, medi ed advocat. Quai na chapescha Kevin betg, ma less er vegnir en quel center da cumpras, là datti electronica. Il bab cumprass gugent ina sutga electronica per la magistra da Kevin, cun sumeglia frappanta da Paris Hilton.

**M**agisters sa serran en il temp privlus d'attestats, magisters sa serran or da societads. Magisters fan endretg, magisters fan fallà. Magisters èn er sensibels, magisters han in cor. Magisters èn er umans e duvrasan bleras charezzas. Aha! Ina magistra sco quella da Kevin sa lascha accompagnar da guardians da 150 kilos paisa viventa. Per quels dus pass davent da sia scola tar la piazza da parcar, cun automats da munaida. Pertge, bab? Bain ina mesira da precauziun, sco era glossists basegnan inqual giada. En autos nairs e parcads spetgan mainvart persunas nairas. Pertge, bab?